

**Danmarkip Naalakkersuisuisa Kalaallit Nunaannilu Naalakkersuisut erngup nukinganik
innaallagissiorfiliornissamik suliniutit aningaasalersorneqarnissaat pillugu
siunnerfeqatigiinnerminnik oqariartuutaannut tapiliullugu Finansministeriap aamma
Aningaasaqarnermut Akileraartarnermullu Naalakkersuisoqarfiup suleqatigiinnissamik
siunnerfeqatigiinnerat pillugu allakkiaq**

Mingutsitsinngitsumik nukissiornerup annertusarnissaa Naalakkersuisut anguniagaraat. Nuup kiisalu Qasigiannnguit Aasiaallu pilersorneqarnissaannut erngup nukinganik innaallagissiorfiliornissamik suliniutit piviusunngortinnera Kalaallit Nunaata CO₂-mik aniatitsineranik annikillisaqataassaaq, ilaatigullu Parisimi isumaqatigiissut naapertorlugu inuiaqatigiit piujuartitsinerusumik ingerlalnissaata tungaanut pingaarutilimmik alloriarnerussalluni.

Qallunaat naalakkersuisui Naalakkersuisullu immikkoortuni arlalinni qanimut, pitsaasumik siunnerfeqartumillu suleqatigiipput, silallu pissusaanik suliniarnermi mingutsitsinngitsumillu ikaarsaarnermi suleqatigiinnerup pitsanngorsarnissaa aamma kissaatigalugu. Siunnerfeqatigiinnermik allakkiakkut Kalaallit Nunaanni *erngup nukinganik innaallagissiorfinnik suliniutit aningaasalersorneqarnissaat pillugu Danmarkip naalakkersuisuisa Kalaallit Nunaatalu Naalakkersuisuisa ulloq 15. marts 2022 siunnerfeqatigiinnermik oqariartuutaata* malitseqartinneqarnissaa uppersarneqarpoq.

Finansministerip Aningaasaqarnermullu Akileraartarnermullu Naalakkersuisup erngup nukinganik innaallagissiorfiliornissamik suliniutit Kalaallit Nunaata aningaasaqarneranut sanilliullugu aningaasatigut annertoorsuunerat, suliniutillu Kalaallit Nunaanni inuiaqatigiinnut pingaarutilimmik attaveqaasersuutaanissaat paaseqatigiissutigaa. Aningaasalersuinissamut atugassarititanik mingutsitsinngitsumik suliniutit taakku piviusunngortinniarlugit, suliniutillu aningaasalersorneqarnerisa ilaasunut tamanut aningaasalersuinikkut akisussaassuseqartuunissaa taamaammat annertuumik pingaaruteqarpoq.

Nuup pilersorneqarneranut Utoqqarmiut Kangerluarsunnguanni erngup nukinganik innaallagissiorfiup allilerneqarnissaanik suliniut kiisalu Qasigiannnguit Aasiaallu pilersorneqarnissaannut nukinganik innaallagissiorfimmik suliniut assigiimmik pingaaruteqartut Finansministerip Aningaasaqarnermullu Akileraartarnermullu Naalakkersuisup isumaqatigiissutigaa. Peqatigisaanik misissueqqissaarnermik suliaqarnerup aningaasalersuinissamillu misissuinerup piareersaasiorneqarnera imaasillugu pilersaarusiornissaanut ataatsimut paaseqatigiittoqarpoq, tassa Utoqqarmut Kangerluarsunnguanni erngup nukinganik innaallagissiorfik Nuummuk pilersuisussaq siullertut pingaarnersiorneqassasoq, Qasigiannnguillu Aasiaallu pilersorneqarnerannut erngup nukinganik innaallagissiorfik tullertut suliniutissatut pilersaarutit suliniutillu ineriartornerat ilutigalugu tullertut pingaarnersiorneqassasoq.

Tamanna tunuliaqutaralugu Finansministeriami Aningaasaqarnermullu Akileraartarnermullu Naalakkersuisoqarfimmi sulinissamut pilersaarusiortoqassasoq, Finansministerip Aningaasaqarnermullu Akileraartarnermullu Naalakkersuisup isumaqatigiissutigaa, tassani Utoqqarmiut Kangerluarsunnguanni erngup nukinganik innaallagissiorfik Nuummik pilersuisussaq pillugu misissueqqissaarnermik sulineq 2024-p ukiuata affaani siullermi ingerlanneqassalluni. Tamanna kingusinnerpaamik ulloq 1. oktober 2024 qallunaat tungaannit tassunga aningaasalersuinissamut – taamaattoqassappallu qanoq aningaasalersuinissamut – inaarutaasumik aalajangertoqarnissaa siunertaralugu. Qallunaat tungaannit aningaasalersuinissamut ilapittuuteqarsinnaanermi Folketingip tapersiinnissaa tunngavissaassaaq.

Utoqqarmiut Kangerluarsunnguanni erngup nukinganik innaallagissiorfimmik Nuummuk pilersuisussamut misissueqqissaarnerup inaarutarnaqarneranut atatillugu, sammisat tullittut inaarutaasumik qulaajaavigineqarnissaat maannakkut ilimagineqarpoq:

- suliniutit teknikikkut inaarutaasumik ilusilernerat;
- Inaarutaasumik niuernissamik pilersaarut;
- Inaarutaasumik aningaasalersuinermik pisariaqartitat aamma aningaasaleeqatigiinnissat;
- Inaarutaasumik suliniutinut isumaqatigiissutissatut siunnersuut, tassani ilaatigut attartornissamut isumaqatigiissummut missingiut ilanngullugu;

- Aningaasalersueqataasinnaasut atugassarititaasullu inaarutaasumik paasisaqarfiginissaat;
- Naalagaaffiup aningaasalersuinermut ilapittuisinnaanera, tassani aaqqissuunneqarnera atugassarititaasullu ilanngullugit.

Finansministerip Aningaasaqarnermullu Akileraartarnermullu Naalakkersuisup misissueqqissaarnermik suliaqarneq aningaasalersuinissamillu misissuinerit siuliani taaneqartut ataatsimoorlutik malinnaaffigissavaat, akuttunngitsunillu ilisimatinneqartarnikkut suliap siuariartorneranik qulakkeerinnissallutik.

København, ulloq 18. januar 2024

Nicolai Wammen
Finansminister

Erik Jensen
Aningaasaqarnermut Akileraartarnermullu
Naalakkersuisoq